

四庫全書

經部

欽定四庫全書

四書管窺卷四

元 史伯璿 撰

孟子

梁惠王上

首章仁義集註仁者心之德愛之理 發明或疑朱子  
仁字之訓孟註先言心之德語註先言愛之理何也諸  
葛泰之曰語之為仁猶曰行仁以仁之用言故先言愛

之理孟子此章以仁之體言故先言心之德 考證此章從全體上說故首曰心之德論語是從孝悌上說故首曰愛之理 輯釋亦引諸葛氏說

二說微異當以考證為優

萬乘千乘百乘集註乘車數也萬乘之國者天子畿內地方千里出車萬乘千乘之家者天子之公卿采地方百里出車千乘也千乘之國諸侯之國百乘之家諸侯之大夫也 纂疏趙氏謂古者方里為井四井為邑四

邑為丘四丘為甸甸六十四井五百十二家通出兵車  
一乘天子畿內方千里提封百萬井除山川溝壑城池  
邑居園囿街路之屬定出賦六十四萬井兵車萬乘故  
稱萬乘之國天子之公卿采地不過方百里出賦六萬  
四千井兵車千乘故稱千乘之家諸侯大國不過百里  
出賦六萬四千井兵車千乘故稱千乘之國諸侯大夫  
采地其大者亦出賦六千四百井兵車百乘故稱百乘  
之家

按論語道千乘之國章輔氏引古註馬氏之說曰司

馬法六尺為步步百為畝畝百為夫夫三為屋屋三

為井井十為通通十為成

一甸之地方八里旁加一里為成故成方十里成

出革車一乘然則千乘之賦其地千成

司馬法又有成十為終終

十為同同十為封之言此說畧之其實千成即一封之地也

居地方三百一十六

里有畸

此即一封之地

惟公侯之封乃能容之包氏曰千乘

之國百里之國也古者井田方里為井井十為乘百

里之國適千乘也馬依周禮包依王制朱子或問謂

二說疑馬氏可據且謂其與孟子王制不同疑孟子未嘗盡見班爵分土之籍特以傳聞言之故不能無少誤王制非三代之書亦不足據今按孟子集註自千乘以下似皆與包氏合者蓋孟子答北宮錡之言如此也集註但以孟子解孟子故不得不如此趙氏亦只因集註而發明之本無可疑但其計井出車又是馬氏之說故其說施於萬乘之國則可通施於千乘百乘則有所不通矣蓋計井出車如趙氏所推則

一成之地定出賦六十四井兵車一乘惟方千里之國則方百里者百方十里者萬方出得兵車萬乘方百里之國則惟有方十里者百定出賦只有六千四百井耳如趙說僅可為諸侯大夫之采地而已趙氏乃為百里出賦六萬四千井兵車千乘可謂誤矣不思六萬四千井乃是千成之地所出也愚嘗謂包氏馬氏二說雖不同然施於孟子則皆有所不通包說於百里之國雖可通於千里之國則有碍馬說於千

里之國雖可通於百里之國則有碍何則包以十井  
為乘百里之國居地萬井故出車千乘然千里之國  
則方百里者百居地百萬井當出車十萬乘今却千  
里止出萬乘是包說施於千里之國則出乘過多而  
不可通也馬以六十四井為甸旁加一里為成成方  
十里出車一乘千里之國則如前所推方十里者萬  
故出車萬乘然百里之國則止有方十里者百不過  
出得百乘今百里却當出車千乘是馬說施於百里



之國則出乘過少難通也畢竟孟子百里出千乘之說不合於周禮正是朱子所謂不能無少誤處集註但以孟子之言解孟子更不泥於計車出乘之詳故亦不至於抵牾趙氏不思百里出千乘之說為包氏之言却又以馬氏之說計井出車此所以不覺其誤今通證中所引司馬法之說甚明顯見趙氏之誤其里數同異之說更於告子下篇魯使慎子為將軍章詳之

移民移粟章五畝百畝 考證古者六尺為步步百為畝然尺有數等周尺以人中指中節為寸人有上中下不同則以中人為度一尺約當今浙尺八寸則百畝無多當別自有地尺若衣服針灸則以人尺為度爾

竊嘗有疑於古今尺度長短之不同先儒之說有周尺又有古尺有浙尺又有今尺大抵莫短於古尺莫長於今尺而周尺浙尺則又每加長焉此外又有不同之尺不可盡數但今所見者官尺民尺耳不知此

二尺較之先儒所論又當屬何尺也先儒謂古尺當  
今尺五寸五分竊嘗以是推之今尺或官尺周尺或  
民尺耳蓋今之民尺亦可當官尺六寸許考之經史  
所言似皆與民尺合者論語言六尺之孤家語言七  
尺之軀蓋人以七尺為中則六尺乃是幼弱可知孟  
子言五尺之童又言文王十尺湯九尺漢史言項羽  
八尺二寸韓信八尺三寸皆是以長短之相懸者言  
然亦不過如此而已若以為如今官尺則湯文安得

有許長五尺六尺不得為童幼矣若以古尺當今民尺五寸五分則湯文羽信反短於今之中人童幼又過於短矣古今器物有變不可為據惟人身長短宜不相遠以此考之則周尺宜與今之民尺不多爭但雜書或有存古時尺樣者又皆只有民尺五六寸許不知如何考證疑地尺當長恐亦以雜書尺樣意之也若以古尺與今民尺不多爭者言之則似不必如此疑矣今田以二百四十步為畝猶不滿民尺之數

則百步之畝亦豈別有地尺哉其以中人中指中節  
為寸却正與今民尺寸合亦可見周尺之與民尺不  
甚相遠矣

寡人願安承教章作俑 發明作俑者殺人徇葬之漸  
孔子惡之者以此 輯釋亦引此說

竊詳經註之意皆只以為俑太似人而葬之為不仁  
而可惡蓋以似人而葬之猶且見惡者以甚使生民  
飢死者之尤可惡乎若以為殺人之漸而惡之則孟

子之言為無味矣檀弓曰不死乎用人乎哉亦以其太似人而用之以殉故云爾非以其為殉之漸而惡之也

見梁襄王章定於一 叢說一謂統天下為一家正如秦漢之制非謂如三代之王天下而封建也此孟子見天下之勢而知其必至如此云云至秦漢孟子之言即驗 考證亦如此說

按柳宗元封建論亦如此見胡氏非之朱子採其言

於綱目未嘗不以封建為聖人制治之要道也孟子之見宜亦不當出此竊以孟子告公孫丑慎子之言推之亦略可見其曰夏后殷周之盛地未有過千里者而齊有其地矣地不改闢矣推此則謂其知統天下為一家如秦漢之制者殆不其然其曰周公之封於魯儉於百里今魯方百里者五子以為有王者作則魯在所損乎在所益乎推此則謂其知統天下為一家非如三代之封建者恐亦未必然也況井田封

建二法相因當時井田之法亦已漸壞孟子豈不能  
知其有開阡陌之勢然而孟子之論王政未嘗不以  
經界為急而不聽其自壞以此推之使孟子得行其  
志又安得聽封建之自壞而因陋就簡僅為秦漢之  
自私而不復三代之公道哉然而孟子每言井田而  
未嘗一言及封建者此恐別有所見當於離婁上篇  
首章辨饒氏說處及之外此則先儒之論已詳學者  
考焉可也



齊宣問桓文章方千里者九 發明千里者九齊楚燕  
秦趙魏韓宋中山之九國也 輯釋亦引此說

千里者九意者只大槩說發明以九國為證恐未必  
然七國大小已自不等宋中山又安得有方千里耶  
若以九州為證謂齊只有青州之地則庶乎近之要  
亦不必如此說可也

蓋亦反其本矣 考證王氏曰前本字指本心後本字  
指王天下之本

按集註於前反本下曰反本說見下文遂於下文註  
曰發政施仁所以王天下之本也又於後反本下註  
曰使民有常產又發政施仁之本也說見下文可謂  
至明白矣而考證乃於兩本字如此說蓋不以集註  
為然也按孟子欲齊王反其本心自篇首舉胡虺言  
以下至君子遠庖廚處反覆詳盡無餘蘊矣故其下  
遂以親親仁民之事告之欲其即此心而推之又反  
覆詰其所以不能言之故而請王度之也前是體

察後是推廣所以發明本心者已盡此自因上文以若所為求若所欲必不可得說下來遂以反本開導其行仁政故下文遂言發政施仁之效以實之集註之言斷斷然不可易矣

章末發明引張氏曰孟子如對鴻廩之問及對好樂好色好貨皆徐徐引之當道至於利國之問則應之以何必曰利桓文之問則對以無道無傳論管晏則曰管仲曾西之所不為言交兵不利則曰號則不可又何嚴

也蓋前數章者一病為一事耳至於霸者功利之說則大體一差無往非病故闢之不可不嚴 輯釋亦引此說

此說固為有理竊意前數者齊梁之君已自知其事之未善故孟子不必更闢其事之不善但徐引之當道足矣後數者則齊梁之君及公孫丑宋牼輩皆不知其事之不善或反以為當然而責之孟子故孟子不得不正誼明道以闢其失

梁惠王下

首章樂樂集註下字音洛 考證俗讀皆然但以語意則上字當音洛蓋娛好之也猶云獨娛聽樂音與人娛聽樂音孰為歡樂下二句同

如集註音則三樂字義與意皆同下一樂字又承上二樂字言之如考證音則三樂字有二意雖亦可通不如且依集註之順

交鄰國章集註字之事之 考證小事大大字小左傳

凡兩出孟子竝作事而集註解事小為字者本古語也然仁人之心既忘己之强大人之弱小雖曰字之其交際往來與事大亦無異故俱作事

雖若事之然與小事大之事不無分別則其實不過字之而已

雪宮章孟子對曰有發明輔氏欲讀有字為一句南軒讀有人不得則非其上矣為一句

竊意當以輔說為正孟子中以有字自為句者有數

處

晏子 考證此章純用晏子言後篇公孫丑竝言管晏而下止言管仲不言晏子蓋孟子未嘗不重晏子也  
叢說後篇丑問管晏孟子獨鄙管仲者晏子之才能功烈皆非仲比管仲輔桓為五霸首尤天下所共宗仰故孟子惟斥管仲

按二說不同當以叢說為正竊意孟子亦未嘗有意於輕管仲也觀其意曰論天降大任於是人而以管

仲與大舜傳說竝稱則固未嘗輕管仲不如晏子也  
人徒見孔子之於管仲既稱其仁又大其功而孟子  
則卑其功烈以為曾西之所不為遂以為孟子之論  
每每不同於孔子也殊不思孔子稱之是為由賜但  
知其有不死之罪而不數其匡合之功故言其有功  
無罪者以釋二子之疑耳孟子鄙之是因公孫丑但  
知大其功而不復知有聖賢之道反欲孟子效之故  
卑鄙其功烈以破丑之惑使知有王道之大耳聖賢



氣象固有不同夫子亦未嘗不小管仲之器也及或人意其儉與知禮則夫子斥其奢僭之失曾不少恕又豈夫子先後所言自相戾哉亦不過因或人由賜所見不同而告之亦不同耳意者孔氏之門若有欲學為管仲之事者夫子亦未必無以曉之況若望夫子自為管仲之事則夫子宜必有以斥其失矣不獨孟子為然也蓋孔子之時人心之義理猶明或人雖不能知仲之失由賜之徒則知之矣孟子之時功利

之溺人也深門人如丑者猶不知之他人尚何望乎  
不然孟子豈但知仲之過而不知仲之功哉

毀明堂章耕者九一集註九一者井田之制也云云是  
九分而稅其一也 饒氏謂耕者九一是以民之所得  
者言謂九百畝中得百畝非說賦稅若說賦稅則是什  
一下文世祿亦是指士之所得言

九一是助法十一是貢法今集註釋九一為井田之  
制則是助而非貢明矣雙峰只因與世祿對言遂以

九一為民之所得殊不知孟子亦只以井田形體之大槩而言則中百畝為公田者恰是九分中之一分若夫以二十畝為廬舍者則未暇細論之耳且果如雙峰所言則請野九一而助國中十一使自賦又當如何分別耶

澤梁無禁集註澤謂瀦水梁謂魚梁與民同利不設禁也輔氏謂澤梁不禁至周禮則山澤皆有厲禁亦禁其暴殄天物者而使取之以時而已發明引陳潛室

曰關市不征澤梁無禁乃王道之始成周關門市廛皆有限守山林川澤悉有厲禁乃王道之成

按四書通於上篇移民移粟章辯陳氏之失曰殊不思集註於此政以厲禁為王道之始蓋所謂山林川澤與民共之即是澤梁無禁無禁者愛民之仁也雖無禁而有厲禁又王者愛物之仁也周官三虞掌山林之政令物為厲而為之守禁註每物有藩界也是觀之澤梁無禁者不禁民之取而有厲禁者禁民

不以時取也竊詳陳氏之說通所以辨之者甚當而發明不免取之於此則通與發明之優劣蓋有不待辨而決者若輔氏以澤梁無禁之禁與民皆有厲禁之禁混而言之亦欠分明愚則以為無禁而有厲禁王道之始固如此王道之成亦未嘗不如此諸儒強欲以此分王道之始王道之成此所以不得其說也讀者詳之

語錄孟子答梁惠王問利直掃之此處又如此開導之

何也蓋此處亦分義利人自不察耳 發明對利國之  
問甚嚴而此諸章甚婉者法語之言不嫌其嚴巽與之  
言不嫌其婉

前篇卒章之末張氏嘗辨及此愚亦附以臆度之見  
矣請申其說蓋惠王於見賢之初發何以利吾國之  
問是以利國之事責之孟子而不自知徇利之為非  
也故孟子不得不直掃之宣王於言論之際自以好  
貨為疾而無隱於孟子則非梁王不知徇利為非者

之比矣故孟子不可不有以開導之也梁王知有利而不知有義宣王非不知義之為是利之為非者特私欲之蔽未能自充耳餘則語錄精矣 發明以法言異言為分別蓋本論語集註之意而言也論語法言異言之義難分別故集註以孟子所言證之至矣為發明者正當於此分別孟子何故以法言對利國之問却以異言對齊王諸章之言以曉學者可也今乃但援法言異言為說則何以異於無星之秤無寸

之尺乎

所謂故國章 集成輔氏謂先儒皆以如不得已一句連下文說言不得已則將使卑踰尊踰戚故不可不慎雖若可通云云且下文但言因國人之言自察其賢否而用舍之亦未嘗言其不得已之意故集註直以如不得已一句連上文說云云故於下段結之云所謂進賢如不得已者如此 通謂輔說甚善但曰下文言用舍處未嘗言其不得已之意則與集註下段結句又自



相反耳

按先儒以如不得已連下文則如為設或之義與如或知爾之如同而不得已為真有所不得已集註以如不得已連上文則如為如似之義與如切如磋之如同而不得已非真有所不得已也輔氏謂下文未嘗言其不得已之意但言不得已而不言如蓋謂其無真不得已之意可見先儒之說不然耳集註下段所謂進賢如不得已者如此之言言不得已而又言

如蓋謂其謹之之至如此爾非謂其真有所不得已也通者謂其相反是不詳如字之義不同與有如字無如字之意亦不相似也

為巨室章 通與發明引饒氏之說曰前譬是說任賢不如任匠後譬是說愛國不如愛玉 輯釋亦引之

前是以大木譬賢人所學者大以匠人斲而小之譬王之欲賢者捨所學而從我以此觀之前譬乃是用賢不如用木耳蓋孟子既曰以為能勝其任又曰以

為不能勝其任不是說求得大木為工師能勝其任  
斲而小之為匠人不能勝其任正是言木大則可以  
勝大屋之任猶賢人所學者大則可以勝治國之大  
任斲而小之則不可以勝大屋之任猶賢人捨其所  
學則不可以勝國家之大任也雙峰正是以勝任不  
勝任屬之匠者所以致誤殊不知孟子只是以匠譬  
王工師得大木是譬王之求得賢人也匠人斲而小  
之是譬王不能用賢人之道也後譬則自如雙峰之

說

伐燕章 考證王氏曰取之勿取正論也言武王文王則贅矣

孟子之言句句是實事武王文王之證自是以聖人為準則以示齊王在於繹其微意之所在不以辭害意可也奈何以察識之不易而遂以為贅乎

鄒與魯關章集註范氏曰云云是以民親愛其上有危難則赴救之如子弟之衛父兄手足之捍頭目也穆公

不能反已猶欲歸罪於民豈不誤哉 通謂穆公歸罪  
於民是責子弟之不能衛父兄手足之不能捍頭目也  
殊不知父兄之愛子弟頭目之顧手足者其常也子弟  
之衛手足之捍則於其時之變者見之穆公不能責已  
之失其常者而責民之不能應其變者有是理哉

穆公之歸罪於民是責民今日之待已不如子弟之  
衛父兄手足之捍頭目然也穆公之不能反已是不  
思已前日之待民未嘗如父兄之愛子弟頭目之顧

手足然也通之意亦如此而措辭未瑩乃若父兄子弟手足頭目自相責然者讀者不以辭害意可也不然天下豈有不衛父兄之子弟不捍頭目之手足耶公孫丑上

首章曾西或人問荅集註引楊氏之說 考證楊氏說未盡此章之意夫曾西言子路則曰吾先子之所畏至論管仲則曰得君如彼其專行政如彼其久功烈如彼其卑此正以作用優劣言也以作用之優劣言則管仲

之功業遠不可望子路何者仲之所以霸不過富國強兵而已夫治千乘之國夫子之許子路與子路之自許無異也且千乘之國又攝乎大國之間師旅饑饉貧弱垂亡子路起而為之比及三年而能使之有勇則其於富強乎何有且知方也則加於富強一等矣使子路得乘千里之金齊其視管仲真不足道矣大抵聖賢作用自是殊絕世衰道微聖賢不用世人但見霸者小小功業即以為大至論孔門諸子則或但以為循良自守而

已真世道之不幸也

孟子答任人禮與食色輕重之分集註以為聖賢於此錯綜斟酌毫髮不差愚於曾西之言楊氏之說亦云嘗謂聖賢之道猶金也霸者之功猶鐵也以大分言之則金鐵之不同貴賤不在言矣然二者之中又各有輕重多寡之差不可不錯綜斟酌以平其價也蓋聖賢之道盡其全體大用如孔顏孟氏者是乃所謂兼金而萬鎰者也子路之學固亦金矣然強其所



不知為知則知有未至也行詐欺天則意有未誠也  
以正名為迂則於平治之道猶有所未盡也然則其  
金之分固未可以萬鎰許之也觀夫子於顏子則於  
治天下之道告之於仲弓則以南面許之於由求則  
不過許以可使治賦為宰而已其分量固有不同如  
此柰何纔及聖門學者不問高下例以伊周事業期  
之與所以期孔顏者皆無異哉霸者之功誠鐵矣楚  
莊宋襄之輔功無足紀為鐵固亦不多管仲九合一

匡之功則其為鐵既多且重價亦不貲未易以一鎰  
二鎰之金準其直也子路於其所為固有不屑然管  
仲才智所就則亦恐非子路所及曾西卑其功烈亦  
是卑其霸功而非王道云爾若如考證之論則曾西  
既自羞比管仲遂謂匡合之功西所易能可乎西亦  
不過自以仲尼之徒故羞比霸者之輔初亦不以作  
用優劣較也合而言之則曾西畏子路而羞管仲者  
就金鐵大分而別其貴賤也楊氏言子路於管仲之

功有所不逮者因其金少鐵多而錯綜斟酌以平其價也夫子之許子路與子路之所自許是量其所堪之才也考證所謂子路乘千里之齊則視管仲為不足道是論其所乘之勢也夫不論其在己之才而論其所乘之勢則夫子用人為不能盡子路之才而聖賢事業不由於己而由於外矣愚則以為以學言則子路非管仲所可同日語以才言則管仲之功子路固有所不逮蓋路之學出於正道仲之才優於霸術

故也或者猶疑孟子言文王由方百里起是以難孟子因齊有其地則王猶反手謂聖賢皆無所賴於所乘之勢不可也是不然自聖賢力量有餘者而言則所乘之勢有小大固不能無難易之異若力量未至乃但欲大其所乘之勢以幸其功之速成政恐用過其才勢大反為所累如黃霸長於治郡及為相功名反損者矣昔高祖韓信論用兵信以高祖不過將得十萬信則多多益辦自常情不知兵者之見未必不

以為信善用兵則雖兵少亦可制勝方見不可及處  
高祖用兵不如信非得兵多則不可以成功殊不知  
信善用兵則兵少兵多皆可以成功但得兵多則制  
勝為尤易亦猶聖賢力量有餘又得所乘勢大則功  
成為愈易耳高祖用兵不及信則用過十萬節制無  
方兵多適為所累又豈能成功亦猶學者力量未至  
但欲大其所乘之勢則不勝任而敗事矣何成功之  
望哉不知識者以為然否考證於論語四子侍坐章

亦如此見愚亦於彼辯之矣參看可也

武王周公繼之然後大行集註文王三分天下才有其  
二武王克商乃有天下周公相成王制禮作樂然後教  
化大行輯講本文無教化字恐只當接上文德字說  
蓋文王之時三分有二尚有一分未被其德所以猶云  
未洽於天下至武王有天下之後周公制禮作樂而殷  
頑亦率德改行然後無一人不歸是德之中是謂大行  
德與教化初非判然不相關者德之推則為教化教

化之流行即德之流行也若但說德而不說教化則德之所以行者人孰曉其故哉聖賢亦何當塊然聽德之自行全不以教化為務耶且雙峰既曰周公制禮作樂禮樂非教化而何又曰殷頑亦率德改行率德改行非教化之行亦何能得其如是哉然則集註固無可疑者矣

饒氏又曰文王何可當也一節當分作兩小節看由湯至於武丁以下言武丁所以中興之易紂之去武丁以

下言文王所以崛起之難

分兩小節亦似是而實不然竊意但通作一節看皆只說文王興起之難自順孟子之意本只謂商家代有賢聖之君已自難變了後來又加之武丁中興故其德澤愈未易衰況紂去之未久故雖暴虐亦未遽至於亡所以文王興起之難耳更以上下文勢參之尤為可見上言天下歸殷久矣下言紂之去武丁未久也正是言其盛久而衰未久上曰久則難變下曰



久而後失亦是言其盛久故未易衰衰未久故久而後失皆是反覆發明始焉文王何可當也一句之意以歸重於文王猶方百里起是以難也之意而已分為二節似乎隔斷了文勢不如統看之為順也

地不改辟矣民不改聚矣 叢說有兩意一說齊地廣民衆地不必更改已自辟民不必更改已自聚矣讀就改字略歇一說地不必再加廣辟民不必再加集聚五字一串讀

竊意如前說則二改字甚無意謂當以後說為正

夫子加齊卿相章我四十不動心集註四十強仕君子  
道明德立之時孔子四十而不惑亦不動心之謂通  
謂孔子四十而不惑在三十而立之後德立而道明誠  
而明者也孟子所以不動心者先知言而後養氣道明  
而後德立明而誠者也輯釋亦引此說

按語錄黃幹問不動心恐是三十而立未到不惑處  
曰這便是不惑知言處可見然則不惑不動心理只

一般不可因孔孟聖賢之分不同而求其異也蓋孔子雖是自誠而明之聖然志學一章自是為學進德之序可言明誠不可以言誠明矣先儒以志學為知之始立為行之始不惑知命耳順為知之至不踰矩為行之至自始至終皆先知而後行何嘗不是自明而誠之事通者只因集註有德立二字使以而立之立牽合互說以為誠明明誠之分殊不思自孔子分上言固當自誠而明自志學與立對言則未可便謂

之自誠而明也況以立對不惑而言乃反以行之始對知之明為誠明之序顯見牽合今亦不必細辨但以中庸本文推之於誠則明矣註曰誠則無不明矣非誠而後至於明也又安有十年之漸哉

無嚴諸侯 發明引饒氏曰惡聲必反不專謂諸侯於褐寬博萬乘皆然 輯釋亦引此說

按上文不受挫與視刺皆以萬乘褐夫對言意本不在褐夫上但以其輕視萬乘無異褐夫見其勇爾下

文無嚴諸侯惡聲當反只為諸侯設益以諸侯人所共嚴憚者而必反其惡聲則已見其無嚴諸侯之實而褐夫不足道矣諸侯萬乘恐亦非有二義戰國七雄皆諸侯而萬乘者也

知言 語錄向來以告子不得於言謂是自己之言非他人之言

此即不得於言註意

然與知言之義不同此是告子聞

他人之言不得其理又如讀古人之言有不得其言之義皆以為無害於事則不動是矣 通謂此猶朱子未

定之說也使以此說為定則又失之矣若曰人之言則惟於古人之言有所未達不可舍置而守諸心若今人言之不達於理者不少雖舍置之可也

按覺軒蔡氏曰不得於言集註與語錄不同豈後語未及改定耶覺軒及門之士猶不敢質言語錄之未定況朱子所謂未定之說又正是集註之意則非言此之時集註猶未定也若以集註不從為未定之證恐未的當且如前篇荅滕文公請擇於斯二者之註

以權對義而言後語錄謂當改義為經後篇道性善  
註以門人撮其大旨與序說自著之言不同而皆終  
於不易凡此之類皆以集註不從為定可乎愚竊以  
為凡語錄之或有異於集註則語錄未定集註已定  
自無可疑若語錄提起集註之意以為未當然後說  
出不同之意者則多是集註已定而猶欠一改者耳  
若謂不可決然知其孰先孰後則亦當兩存之可也  
通又以為若今人言之不達於理者不少雖舍置之

可也為非人言之證則非也孟子知言正是於人言之是非得失無不究極如因言之詖淫邪遁而知其心之蔽陷離窮却正是於人言之不達於理者而知之何嘗以其言不達於理而不究極其所以非與失哉 輯釋於此段語錄及通昏不引之者蓋以通言為定而遂去之也

敢問何謂浩然之氣集註孟子先言知言而丑先問養氣者承上文方論志氣而言也 語錄向來只謂他承



上文方論志氣而言今看來不然乃是公孫丑會問處  
留得知言在後面問者蓋知言是後面合尖上事如大  
學說正心修身只合殺在致知在格物一句蓋是用工  
夫起頭處 通曰此段語錄亦與集註不同然不比前  
說知言處人已懸隔也故存之蓋謂公孫丑承上文言  
志氣故且問養氣而後及知言便如大學首章先言正  
心誠意而後及致知在格物也 輯釋亦引此段語錄  
朱子以向來之說今看不然則是集註與語錄各主

一意從集註則語錄為未定從語錄則集註為當改  
無兩從皆可之理通者以其不與集註懸隔而存之  
則兼備一說可也今乃含糊其說兩可其論既主此  
而又欲兼從彼政恐未必朱子之本意也

考證孟子先言知言而丑乃先問養氣雖因論氣而遽  
及亦是丑之學未能知所先後也 叢說謂集註考證  
不同竊意孟子亦有此文法滕文公下篇孟子先言出  
疆必載質後言三月無君則弔周霄乃先問無君後言

載質正與此同

按考證正與前段語錄之意相反恐當以語錄為正  
蓋孟子自著此書使果如考證未能知所先後之疑  
則丑雖失問孟子作書之時豈不能少易其序以開  
來學乃因其誤而不變耶如此則語錄以大學為證  
無可疑矣又其不然則但以集註為正而以叢說所  
引斷之可也

必有事焉而勿正心勿忘勿助長也集註此言養氣者

必以集義為事而勿預期其效其或未充則但當勿忘其所有事而不可作為以助其長乃集義養氣之節度也 輯講必有事焉而勿忘勿助長是集義工夫正而助長是要義襲而取集義義襲兩句乃是一段骨子以集義為無益而忘之者不耘苗者也以義襲為心預期其效而助長揠苗者也又謂是集義所生者故當以直養非義襲而取之也故當無害惟其是集義所生者故當心勿忘惟其非義襲而取之故當勿助長 考證必

有事焉而勿正是集義正而助長是義襲集義義襲是  
養氣一節大指 通發明輯釋皆全引饒氏說 通自  
說見後段

按前節是集義所生處集註之末云然則義宣在外  
哉告子不知此理乃曰仁內義外而不復以義為事  
則必不能集義以生浩然之氣矣此節集註末云如  
告子不能集義而欲強制其心則必不能免於正助  
之病其於所謂浩然者蓋不惟不善養而又反害之

矣此二條皆以告子為證告子以義為外固不復以  
集義為事矣則其正而助長又安肯以義襲而取之  
哉然則以義襲為正助與朱子之意不合一也語錄  
曰助長者無不畏之心而強為不畏之形又曰氣未  
至於浩然便作起今張主謂已剛毅無所屈撓便要  
發揮去做事便是助長此二條說助長皆只是氣未  
浩然便強悍做作自以為浩然了正與後節集註論  
告子冥然無覺悍然不顧者相似雖非集義自然生

氣之比亦非靠義襲而取於外之謂不過但就氣上  
做出浩然之形狀而已然則以義襲為正助與朱子  
之意不合二也前節集註釋義襲之指曰非由只行  
一事偶合於義便可掩襲於外而得之也此節語錄  
論正助之病曰勿正與勿助長是論氣之本體上添  
一件事不得此二條說義襲助長意自不同義襲猶  
是知有資於義者但工夫不如集義之有素故生之  
無術而不知非襲之可取耳若助長則更無資於義

但就氣之本體上強欲增益之而已然則以義襲為  
正助與朱子之意不合三也愚往年亦嘗有取於雙  
峰之說後乃疑其不然而無所取正於是徧求語錄  
或問及朱門高弟之所議論皆無與之同者然後反  
覆朱子之意乃能知其果不相關如此通與發明輯  
釋盡取其說固為無見考證則勦其說以為己意尤  
無見而可鄙者也然則集義襲與正助之形可以  
異日請即以孟子耘苗堰苗之說喻之蓋苗猶氣也



耘猶義也譬之有苗於此時時耘之人力無有不至  
至於日至之時不期苗之長而自長者集義所生之  
意也未嘗耘之任其自生自長至於久而不長乃一  
加耘之之工便以為可使苗之長者義襲而取之意  
也二者雖有常暫之不同然皆有賴於耘有資於義  
也若助長則更不復有資於義但正之不得便就氣  
上做出浩然之形狀而已如苗已不復有賴於耘若  
要其長則但堰之使似乎長而已也以是推之則義

襲助長之本不相關者庶乎不難辨矣

集成輔氏曰云云又無所作為如正忘助長以為之害  
考證氣本大而剛順而行以養之勿令有所屈曲愧  
怍以害之 通謂云云正忘助三字相因皆是為害助  
之害愈甚大抵必有事是集義是以直養正忘助是義  
襲是害 輯釋亦引通說

按輔氏以作為為忘以忘為害考證以屈曲愧怍為  
害通以忘為害以正忘助為義襲皆非經旨蓋屈曲

是不直愧怍是非義以為忘則可以為害則不可輔  
氏所謂作為却是害而又不可言忘通以忘為害亦  
猶考證與輔氏之病皆不可不察輔氏是偶欠思耳  
考證與通則皆因蹈襲雙峰義襲為助長之意遂併  
以忘為義襲與害則又病中之病也何則忘只是忘  
其所有事是以為無益而舍之者此則全然無所事  
事了豈義襲之謂況孟子自謂助長以為非徒無益  
而又害之分明謂忘但無益未至於害助長則又有

所害矣今併以忘為害可乎

詖淫邪遁 通謂集註釋我知言曰識其是非得失之  
所以然蓋上文汎指天下之言故兼是非得失知之此  
則似指告子之言故專於失者而知之也 集成蔡氏  
謂知言則善惡邪正皆當知之此獨知其失者何也蓋  
孟子時楊墨之言盈天下正人心闢邪說莫此為急故  
也 輯釋亦引此二說

按語錄論此有曰天下之理不過是與非而已既知

得箇非便知箇是矣詳味此言則通與蔡說皆未必  
然且如聖賢論恕每從反處說論四端亦皆就心所  
拂處說皆此意耳亦皆意其何所為而言之可乎況  
平正通達之言出於本心之義理義理則其致一也  
故易見詖淫邪遁之言由於心之有所蔽心之蔽固  
非一端氣稟物欲學術習俗皆所蔽之由也欲因其  
言之病而知其心之失豈不難哉然則既能知其非  
之難知者又豈有不能知其是而易知者乎通者但

因集註末引告子為證故如此意之耳殊不知集註  
但推告子自不免於如此者以見其不能知言之意  
耳何嘗謂孟子所言專指之哉蔡說雖若可通然不  
若語錄所改之廣恐亦非孟子本意當更詳之通與  
蔡說所指不同而輯釋皆引之不知當以何者為定  
耶

通謂此章前則深斥告子闢異端也後則推尊孔子承  
聖道也

直指告子為異端充類至義之盡也但此章本因論  
不動心而及告子至章末又因公孫丑再問而及孔  
子皆是議論節次所及如此若以為闢異端承聖賢  
之證恐求之太深非孟子意乎

汙不至阿其所好集註汙下也假使汙下必不阿其所  
好而空譽之 輯講汙字屬上句屬下句皆無意義恐  
決字之誤 考證以文勢言汙字當是決字之誤

孟子既曰智足以知聖人又曰汙不至阿其所好詞

氣之間揚而若抑抑而復揚皆所以極明其言之可  
信蓋世間自有明足以知人而不能無所阿私者則  
其言猶未可信也故必如集註假使汙下之說然後  
下句足以備上句未盡之意意味深長雙峰反以為  
無意義何耶若以為決文意固直政恐智者之未可  
必其無私也考證又勦之以為已說陋矣

饒氏謂宰我謂觀夫子賢於堯舜不知他所觀在何處  
不可曉看來程子不甚取宰我之言所以將事功來說



集註引此說似是朱子微意

詳孟子首以智足以知聖人汙不至阿其所好之言  
稱贊三子以發其端然後引其言如此使宰我之言  
未盡善則孟子為失言矣程朱亦但釋其賢於堯舜  
者之所在不知雙峰如何見得不取與微意之端的  
況朱子中庸序又自用其語意乎雙峰此疑恐未必  
然

出類拔萃 叢說類指衆人萃亦指衆人類衆聖人也

拔萃孔子也

按上二類也之類謂麒麟與走獸同為毛蟲之類鳳凰泰山河海亦然猶聖人與入同為人之類也出類拔萃謂麒麟鳳凰泰山河海聖人獨於同類之中出類拔萃也自生民以來未有盛於孔子是又言自古以來未有出類拔萃如孔子之尤盛者也叢說所言不曉所謂

尊賢使能章

叢說屢無夫里之布之屢民居也周禮

所謂上地夫一廛百畝五畝之宅是也載師宅不毛者有里布宅即五畝之宅布即泉也宅不種桑麻者罰之以一里二十五家之泉疏云二十五家之布稅也又曰民無職事者出夫家之征註云夫稅家稅也夫稅者百畝之稅家稅使出士徒車輦給徭役按載師之法是宅不毛無職事兩事之罰今孟子乃曰無夫里之布則是居廛者使出二十五家之泉而又出百畝之稅也集註言一家力役之征是因所引夫家之文而併釋之恐於

夫里之布無所當愚詳天下之民願為之氓是境內田間之民皆使之出是兩等之賦只是一家田稅之外多出里布耳與上文市廛之廛不相關蓋上既曰市廛而不征是居市者已征之孟子固以為過矣而又出此兩等不亦太繁重乎而集註上廛字既釋為市宅於下廛字乃曰市宅之民已賦其廛又合出此夫里之布二廛字合而為一是不敢必知其果如此也

按此與集註微異姑備一說以俟知者

人皆有不忍人之心章怵惕惻隱集註惻傷之切隱痛之深 考證因上文怵惕惻隱以為訓怵惕是驚動則惻隱作痛傷若以下文四端例之皆是兩面獨惻隱是傷痛一面但稍有淺深耳按仁貫四性則惻隱貫四端但曰傷痛不見貫四端意四端皆從動處發惻隱之心兼怵惕言則怵惕為驚動但舉惻隱言則惻為動隱為痛惻者感於外而動於中隱者痛於中而發於外惻則專言之仁之端隱則偏言之仁之端也

按惻隱二字欲貫四端得考證如此發明儘佳但朱子嘗言四端八箇字每字是一意然則集註訓惻為傷訓隱為痛不應只說得一面而已意者傷有傷於人痛有痛於已意思觀禮記知死者傷之傷分明有哀悼其人之意若痛則因傷後而隱痛於心無可疑者當更思之

集註愚按四端之信猶五行之土無定位無成名無專氣 饒氏曰謂之有亦得謂之無亦得以四方言之土

固無定位以五方言之則中央屬土故河圖以五居中  
為土亦有定位也云云不可專執一說 通謂饒氏之  
說云云愚見朱子之說是就五方看方看得試以河圖  
看之五土居中似有定位然三八木位乎東不可以西  
一六水位乎北不可以南如中間五點則自具五方而  
於東西南北無所不該似有定位也 輯釋亦引通說  
按通之辯饒說如此亦不可謂之無見矣竊意五方  
之說猶有可疑蓋中可指外為方外不可指中為方

故方之為義可以四言不可以五言也夫方之形體必方正而後可分如方田方千里方百里皆是從四外而度之地方則徑一圍四亦是此意若以五分之則參差不正而不可以言方矣或疑此所謂方乃方向之方方千里之類似是端方方正之方混而無別奈何是不然所謂方千里者豈端正千里之謂正以方向言之方必有四隨其所向各一千里合而度之則其形體自端正耳是故自中央而視四外則東一



方也西又一方也南一方也北又一方也方向既定  
界而別之非東即西非南即北雖中央為四方之交  
亦皆惟其方之所近而各有所屬無不東不西之處  
也自四外而視中央則東之所極即屬於西南之所  
極即屬於北中特因四方交會之所極而得名固亦  
不能自有所分而與四方竝立為一方也然則中央  
之五亦但只在四方之中位乎東西南北之交而初  
無一定之位也又何可以五方言哉彼其以三方五

方八方十方為說者則其方但為方所之方而非方  
向之方也未知然否

伯夷非君不事章 輯講才偏便非聖人中正之道其  
流必皆有弊故君子不由

按集註亦有既有所偏則不能無弊之言不知與雙  
峰其流必皆有弊之意同歟曰不同集註之所謂弊  
弊在二子之身雙峰之所謂流弊弊在學二子而不  
成者然則孰為正曰當以集註之說為正曰何以知

其然耶曰以朱子平日議論而知之也朱子之言有  
曰夷惠隘不恭不必言效而不至者其弊乃如此只  
二子所為已有弊矣非集註之所謂弊弊在二子之身  
乎又曰諸先生恐傷觸二子所以說流弊今以聖人  
觀二子則二子多有欠缺處才有欠缺處便有弊所  
以孟子直說他隘與不恭不曾說末流如此也非雙  
峰之所謂流弊弊在學二子而未至者乎合而觀之  
則集註之說為正可見矣惜乎通者獨取饒說而於

語錄此等議論皆莫之取使讀者無所取正也

公孫丑下

首章環而攻之而不勝夫環而攻之必有得天時者矣  
集註言四面攻圍曠日持久必有值天時之善者

按俞壽翁周官復古有曰周禮有兩環人亦離而二  
之者也司馬之環人掌致師釋者曰環猶卻也司寇  
之環人掌送迎邦國之通賓客釋者曰環猶圍也環  
一也而彼此異議何也在司馬者有師旅之事則附

以卻之名在司寇者有令環之之語則因之以圍之  
之說皆惑也按春官箬人九曰巫環巫箬音也以箬  
環知吉凶也孟子曰環而攻之而不勝夫環而攻之  
必有得天時者矣環居九筮之一蓋筮之名也故曰  
辯九箬之名釋九箬者曰箬環箬致師也此蓋本司  
馬之環人而言不然也環自筮名之一耳故孟子曰  
環而攻之必有得天時者矣今釋孟子者未得其說  
則曰圍而攻之夫圍而攻之遽曰得天時絕無意義

蓋環者筮而用之軍師之名也環而攻之者筮而行也攻之則筮吉故曰必有得天時者矣故環人掌致師致師者賈勇而致敵非得吉卜不可也曰察軍慝環四方之故釋者曰卻其以事謀來侵伐者若如註釋即環四方之故一句絕不可解蓋筮其故云爾至於司寇之環人曰云云舍則授館令聚橐有任器則令環之古者邦國之賓客蓋有叵測者楚人之衷甲荀息之假道若此類非細故也使不占其吉凶而為

之備則非古人備不虞之意故聚摯令環皆以警備之也然則其於司馬環人之職非有異矣蓋司馬之環人至降圍邑而止未成章也以司寇之環人足之章始成若以環為卻曰卻四方之故可乎以環為圍曰賓客有任器則今圍之可乎賓客未有他也而遽圍之亦非待賓之禮矣壽翁此言非為孟子環字設也但以環為筮似於文義為順不知識者以為然否壽翁名庭椿朱子同時人朱子嘗復其書深稱其復

古編之考索已當故錄於此云

餽金章 考證按前篇註二十兩為鎰則一鎰已是一斤四兩但古今稱輕重不同且以漢稱較之漢一斤當今四兩三錢重強 叢說禮註及趙岐皆曰鎰二十兩國語二十四兩為鎰字書曰鎰溢同數登於十則滿又益倍之為溢則二十兩為有義

按如考證說則是古今兩有輕重一斤雖皆十六兩然亦因兩而有輕重矣又先儒皆因國語而疑集註



今得叢說如此考究則集註可無疑矣

孟子之平陸章 考證集註士戰士去之殺之也此依古註按持戟止是階前庭下執戟之人庶人在官者去之止是廢棄之

按集註所以釋士為戰士者以有失伍字在下文耳伍須作行列說方順不知庭下執戟之人亦可言伍否既是戰士失伍則去之是殺之無疑若庭下執戟之人亦可言伍則去之如考證之說可也當更詳之

謂蚺鼃曰章集註孟子居賓師之位未嘗受祿故其進退之際寬裕如此 輯講或疑孔子不脫冕而行與孟子之說不同饒氏曰正是一般蓋孔子有去志久矣但去得不恁地逼迫後來膳肉不至方不脫冕而行於衛亦然 輯釋諸編皆引之

孔子於魯為司寇攝相事却正是有官守者與孟子位賓師不受祿者不同孔子久有去志猶待膳肉不至而後行者非進退有餘裕也蓋仕於父母之邦若

以受女樂而去則是顯其君相之惡無忠厚之意矣  
故腍肉不至則得以微罪行矣引以證孟子之事恐  
未的當若衛事則庶乎近之

自齊葬魯章得之為有財 考證當於為字作讀謂禮  
制所得為也集註為作而恐不必改夫禮制所得為者  
如棺槨衣衾之美也所不得為者如棺槨重數之類此  
不可踰越而為之者也

按集註改為作而亦在疑似之間考證之說未為全

背但之為二字終覺牽強除非挑轉作為之乃可耳  
不知如何

沈同私問章集註楊氏曰燕固可伐矣故孟子曰可使  
齊王能誅其君弔其民何不可之有乃殺其父兄虜其  
子弟而後燕人畔之乃以是歸咎孟子之言則誤矣  
饒氏曰惟天吏可以伐有罪之國諸侯如何擅相征伐  
沈同但知其人之可伐而不知已之不可伐人通謂  
燕雖有可伐之罪齊則非伐罪之君

集註之說活饒氏與通之說則死而不活使齊王能誅其君弔其民有以慰燕民之望而服諸侯之心如此則即天吏之所為耳故曰何不可之有今日諸侯如何擅相征伐曰齊非伐罪之君則湯武何嘗不是諸侯孟子又何嘗不以湯武之事望齊王顧齊王所為如何耳豈可以無道必之哉語錄或問之意皆與集註相發不可不察

燕人畔章周公使管叔監殷管叔以殷畔輯講看來

當成王疑周公之時雖二公在成王之側也不敢措一辭止候機會之來直因天大雨雷電以風後方引成王去啟金縢之書

二公候機會引王啟金縢之說甚不正大當考之書去齊宿於晝章 輯釋士毅按孟子之於齊齊王既不能如繆公之待子思固無以安孟子矣次焉而齊之羣臣又無賢者為之維持調護孟子亦豈能安其身哉云云

孟子既言繆公待子思之事又言泄柳申詳自處之事姑以二事並言以見賢者去就之義有此二等之不同耳至於所以自處則惟在於子思一事若泄柳申詳則因帶言之非欲以其事自處也觀其言曰繆公無人乎子思之側則不能安子思然則繆公以待泄柳申詳者待子思不能安子思矣孟子平日自知之明自任之重為何如齊王若以繆公待泄柳申詳者待之其不能安孟子明矣況其下文有子為長者

慮而不及子思之言可證乎輯釋次焉以下議論恐未為知孟子者當刪

充虞路問章 叢說孟子曰待文王而後興者凡民也若夫豪傑之士雖無文王猶興孟子則不待文王而興者也王者興而有名世者是猶有待於文王者也孟子雖無王者興苟有尊德樂道者則孟子亦能興之也

按彼章集註以興為感動奮發之意則興如詩可以興之興乃是興起為善之心也叢說如此說則興如



其言足以興之興乃是興起在位也況王者興必有  
名世孟子時無王者興故孟子不得名世當今之世  
舍我其誰其意蓋曰當今之世但未有王者興耳如  
有王者興則名世之任舍我其誰當之叢說云苟有  
尊德樂道者則孟子必能興之竊意尊德樂道非王  
者不能惟孟子時無王者興故無能尊德樂道者耳  
論語有美玉韜氏亦如此說愚嘗辨之可與此參  
看

仕而不受祿章 發明曰不受卿祿此孟子最高處其  
超然不屈進退餘裕本全在此一受其祿則為祿所縻  
是為祿而仕耳云云吾意戰國之世高節如許惟孟子  
一人而已庶幾焉者其魯仲連乎

中庸以爵祿可辭與中庸不可能為二事孟子不受  
齊祿是權其不當受而不受是義是中庸若但欲以  
此為高使齊王不得縻之而不受則是計較自私而  
不足以語孟子矣以是而稱魯連可也魯連却止是

爵祿可辭而未必合乎中庸者孟子所為豈魯連所  
可同日語哉

滕文公上

首章道性善言必稱堯舜集註性者人所稟於天以生  
之理也渾然至善未嘗有惡人與堯舜初無少異但衆  
人汨於私欲而失之堯舜則無私欲之蔽而能充其性  
爾通謂人不能皆堯舜者氣質之拘物欲之蔽也集  
註言物欲不言氣質蓋以孟子不曾說到氣質之性故

但據孟子意言之 輯釋亦引通說

物欲氣質不同似矣但集註言私欲而不言物欲柰何意者私欲物欲又自不同不可不察蓋私即發於形氣之私欲即感物而動之欲私之源從氣上來欲之流從物上去此二字雖不指氣與物說而氣與物所以拘蔽乎我者此其機也集註一字不可輕改如此通者只因改私為物便一向牽合孟子不說氣質上去可謂因誤致誤良可為讀書不仔細者之戒

夫道一而已矣集註時人不知性之本善而以聖賢為不可企及云云故但告之如此以明古今聖愚本同一性前言已盡無復有他說也 通謂按饒氏謂道一而已矣與性一而已矣不同性以所稟言道以所由言集註此處說得性字稍重愚見集註豈不能曰同一道而必曰同一性者蓋推本而言欲自上文說來性外無道同此性即同此道又何疑也乎

按通所以辯饒氏之說是矣但饒氏自上節說性善

堯舜處已與集註不同此節又是承上節所說之意  
而言耳其於上節則曰孟子之意不在性善只在稱  
堯舜欲世子凡事學堯舜又恐其以堯舜為難及所  
以先道個性善惟其上節如此說故於此節則曰世  
子再見孟子已信孟子性善之說了但疑堯舜非人  
所及孟子說道一而已矣是就堯舜上說不是就性  
上說云云如通所述竊意性善是古今智愚之所同  
然者堯舜之所以為堯舜者以其能盡此性而已後

人之所以皆可為堯舜者以其同具此性而已同具此性而不能皆堯舜者以其不知性之本善遂謂聖人不可幾及是以終不能自拔耳故孟子每每發明性之本善者以示人七篇之中歷歷可考不獨告世子為然第以道學不明人皆不知性之本善觀於當時告子公都子所問難及後來荀揚之論可見故孟子必稱堯舜以實之耳集註謂其知仁義不假外求此說道性善一句聖人可學而至此說稱堯舜一句

可謂道理事實兩無所遺不知雙峰何為疑之耶況  
謂意不在性善只在堯舜則是泛泛言性之善而不  
力乃遽以堯舜之事責望於人安得不啟人之疑若  
謂恐人以堯舜為難及所以道箇性善然則何不先  
使之學堯舜然後發明性善者以曉之乎今經文先  
說性善乃及堯舜而雙峰乃如此說孰若集註順文  
解義之為勝乎如此則集註此節之說自無可疑通  
者之辨無以加矣饒氏又謂當以孟子所舉成覿顏



子公明儀之說推之可知其意愚亦謂當以孟子所舉此三事推之可見集註之意已無可議蓋道一而已矣便是上節道性善之意所舉三事便是上節稱堯舜以實之之意耳尚何疑乎

公明儀 考證儀與孟子年輩相及

觀於孟子言羿有罪而儀以為宜若無罪是相應答之辭可見

齊疏之服 考證按禮為父斬衰為母齊衰至若疏衰

則又次於此今滕定公薨文公當為斬衰而云齊衰似可疑豈古者天子諸侯斬衰之布止用疏布為之歟又按魯穆公卒使人問於曾子對曰申也聞諸申之父曰哭泣之哀齊斬之情饘粥之食自天子達此數句與此正同蓋古語傳誦之訛孟子引之爾當作齊斬之服恐孟子非不能察古語之訛而引之者此處但當闕疑若信已之耳目而反疑聖賢之不察則近於僭誕矣

問為國章

輯講語錄中說孟子誤引詩來證周家用

助法

按語錄但有云云這是不曾識周禮只用詩意帶將去之言未見有如饒氏所舉者

朱子之

意只把徹做法了孟子之意不然徹則無分公私但周人是因助之田而行徹之法然周雖用徹法有用助處畢竟優於鄉遂

饒氏之意豈不曰徹不過因貢助之法而用之於鄉遂都鄙而已徹固自無法也然夏之貢商之助以五十七十畝為限未嘗有百畝之制也貢助固是夏商

之法貢助皆以百畝為限非周之徹法乎夏用貢而不用助商用助而不用貢竝用貢助而變易其制又非周之徹法乎至曰但周人是因助之田而行徹之法則非也七十百畝之法既異則井之大小廣狹固不同矣又如何因其田而行徹法之得此又不通之論也

或問三代授田之多少不同何也朱子曰張子嘗言之矣陳氏徐氏亦有說焉然皆若有可疑者云云陳氏曰

夏時洪水方平可耕之地少至商而寢廣周而大備也  
徐氏曰古者民約故田少而用足後世彌文而用廣故  
授田之際隨時而加焉 饒氏謂夏尚忠所以民只用  
得五十畝周家禮文煩用度廣須是百畝

田不過是出粟米粟米不過以供日食夏時雖地少  
民約而尚忠如何使民食只半於後世後世雖地廣  
彌文而用度多又如何民頓能倍食於古畢竟如諸  
家之說非古者民傷於飢則後世之民失於飽矣朱

子以為皆若有可疑固謂田間疆理都合更改恐無此理恐愚見亦是可疑之一端忠與文約與廣可以論其他財用非所以言粟米也意者田制既亡則易代更張難定語錄之疑信矣朱子謂孟子只是傳聞如此恐難盡信然則讀者政不必求其說之必通也饒氏謂云云鄉遂用貢法都鄙用助法三代所都之地不同則鄉遂都鄙亦恐卒難做過至於溝洫塗畛亦非一朝一夕所能成

此說自與朱子合但語焉不詳乃若三代皆通行貢助二法於都鄙鄉遂者豈記錄之失其意耶當更詳之

章末集註引呂氏所論子張子之意發明曰未易言也廢之數千載而欲復之於一旦難哉難哉

張子之意呂氏言之朱子引之固非無用之虛言也而發明不以為然何也愚則以為復數千載已廢之法惟張朱得時行道乃可耳固非望如發明者之能

行也發明柰何以已之不能度張朱之言為虛言乎  
晨門謂孔子為知其不可而為之發明於張朱之學  
亦然

許行章集註史遷所謂農家者流也 考證太史公六  
家指要無農家至班固藝文志分九流始有農家者流  
此集注未及改

理或有之

聞君行聖人之政 叢說許行言仁政是孟子所言并



地之法陳相言聖人之政是許行言神農之法許行來  
文公不斥絕之而與之處故陳相謂已行其法

按許行始至自謂孟子井田之法為仁政則雖有陰  
欲沮壞之意固未敢公然言於文公之前也近悅遠  
來理宜納受文公亦豈得不與之處而斥之乎曰與  
之處不過如其所言使得受一廛而為氓耳非文公  
身自與之遊處也叢說遂以與之處為行其言過矣  
觀陳相見孟子言滕君厲民自養未得為賢可見文

公未嘗用許行之言而沮井田之法矣況陳相先見  
文公便言聞君行聖人之政則聖人之政便是指井  
田之法無疑後見許行乃大悅而學之則相未見行  
之前固不當稱許行之言為聖人之政也意者許行  
陰欲沮壞孟子之法而未敢發且令陳相以己意宣  
於孟子之前以諷之若孟子論屈則彼必肆行無忌  
憚矣觀孟子終篇只破行相並不畧見滕君為其惑  
之意則可見矣

滕文公下

首章 通引屯六二女子貞不字與蒙六三勿用取女  
證不枉己之意且曰六二稱女子六三稱女不稱  
子一字去取之間嚴矣哉

通引此二爻為證似矣但以稱子不稱子為分別則  
程朱未嘗有此意假如所言則咸之取女吉家人之  
利女貞漸之女歸吉皆不稱子豈亦以其不能自重  
而去之耶

景春曰章丈夫之冠 考證冠恐當作娶字與下嫁字  
對按儀禮士昏禮父醮子而命之曰往迎爾相若冠則  
賓醮而命之字父不親命也

按孟子父命下無辭冠是成人之道命冠雖出於賓  
而擇賓實由於父輕改經文以就已說則亦何所不  
至哉上篇欲改齊疏為齊斬亦此意

宋小國也章今將行仁政 輯講滕方行王政齊楚便  
去迫他然孟子但告之曰君如彼何哉強為善而已矣

宋則未行王政故言不行王政云爾苟行王政四海之內皆舉首而望之欲以為君滕則已行故孟子勉之為善然孟子尤拳拳於齊畢竟齊有其土又有其民

雙峰此言不為無理但語焉不詳使孟子齊楚雖大何畏焉與君如彼何哉二語若相反者至曰滕則已行故但告以君如彼何哉云云宋則未行故言不行王政云爾云云則似已行者則不敢過許之未行者則大言以許之者如此則孟子之意不幾於誣乎蓋

宋雖小國然猶地方數百里與齊楚魏為敵國與滕之將五十里間於齊楚者事勢不同滕則削弱已甚故雖已行王政亦不可以王業期之則但勉之為善而已宋雖未行王政然或苟能行之則可變弱為強因此而為政於天下可也至若尤拳拳於齊者一則以其國之大二則因齊王之有意於孟子而又可以為善於宋則僅如此言者一則以其國之小而反以攻伐為王政二則宋實未嘗用孟子孟子特自與其

徒議論之耳況與戴盈之戴不勝之流言之亦未嘗以宋為不可為特較之於齊則勢有小大故為之有難易耳未可遽與滕例論也

有攸不為臣集註謂助紂為惡而不為周臣者 發明採張氏曰文武於商為西伯有攸不為臣不臣於商以紂之命征之也

有攸不為臣如張說固亦可通但此句之下即與東征取殘之意相接正是伐紂之事則張說又不可通

宜集註不從之也況惟臣附周與君子小人以類相  
迎之意又皆與上句照應然則集註何可疑之有發  
明何必引張以眩學者

戴盈之章 發明請輕之如減日攘為月攘不知其非  
義不智也知其非義而不速改不勇也不智之罪小不  
勇之罪大 輯釋亦引之

按請輕之請損之皆便是已知而不速改者耳無不  
知與知之分發明不智之說無著落處不可曉



好辯章 禹掘地集註掘去壅塞 考證然亦有掘平  
地處如兗州平土當河轉之衝故醜為漯水疏為九河  
震澤三江亦然其餘亦多是開鑿岨壅塞爾


竊意漯水九河震澤三江亦須元有故道禹但因而  
疏浚之耳未必皆是禹就平地所掘成也縱有援據  
恐亦不可盡信以理推之可也

知我罪我集註胡氏曰云云罪孔子者以謂無其位而  
托二百四十二年南面之權使亂臣賊子禁其欲不得

肆則戚矣 發明罪孔子者只當至權字而止而加一也字使亂至戚矣十五字合刪此乃春秋之功以之言罪侵過分劑矣 輯釋亦引此說

罪孔子者即是亂賊既戚而以無位托權為孔子之罪耳若刪此十五字則罪孔子者使誰當之集註於知孔子者之下云為天下後世慮至深遠也於罪孔子者之下如此說便見天下後世同以孔子為功亂臣賊子獨以孔子為罪知孔子者公論也罪孔子者

私言也集註一字不可輕改乃欲刪其十五字發明  
僭誕之罪大矣輯釋阿其所好而引之不足責也



四書管窺卷四